

九年無事亦無詩默默昏昏不自知天下有人能似我願拈丹
訣盡傳之

題武當山

七十二峯蒼翠間武當山色似衡山明朝飛過湖南去八九峯
頭自往還

衡嶽

今日完全五嶽遊身騎黃鶴駐峯頭曾於北鎮先尋訪直到南
衡始罷休萬里漫云燕楚隔兩山剛被坎離收天然道妙同行
轍又看湘波九面流

登岳陽樓用杜韻

道藏輯要

三丰全集 古今詩類

三 續畢集九

欲上君山頂飛吟到此樓一湖南北限千里水雲浮沙外幾行
雁天邊數點舟江河渟蓄處廣大不奔流

道走河南公卿頗有聞余名者書此笑之

棄却功名浪蕩游常將冷眼看公侯文官武將皆塵土綠黛紅
妝盡鬪餽鶴駕高飛南嶂月鴉聲亂噪北邙秋離離草色俱凋
謝早向雲山問路頭

晚步咸陽

天邊飛雁排雲表我亦長吟咸陽道咸陽古道草迷離百代王
侯盡枯槁西行萬里多感懷人生豈若神仙好任他滄海變桑
田鶴貌松姿長不老